

# 1 Korintionan

Tin ora ta importante pa kòrda kua karta apòstel Pablo a skirbi promé, di dos, di tres, èts. Den kaso di 1 Korintionan, e òrdu kronològiko ku su kartanan a wòrdu skirbí ta importante. Lo siguiente ta e probabel òrdu: Galationan, 1 Tesalonisensenan, 2 Tesalonisensenan, 1 Korintionan, 2 Korintionan, Romanonan, Filipensenan, Filemon, Kolosensenan, Efesionan, 1 Timoteo, Tito, i 2 Timoteo. Tin ora bo por haña instrukshon den e promé kartanan ku no ta bin dilanti den e kartanan skirbí mas despues. Den e kapítulo aki, nos lo pensa tokante un di Pablo su promé kartanan—1 Korintionan.

Nos a kaba di studia Romanonan, un buki ku ta enfatisá siñansa doktrinal. Awor nos ta pasa pa e buki di 1 Korintionan—e di dos karta mas largu ku Pablo a skirbi. (Romanonan ta e karta mas largu ku el a skirbi.) En kontraste di Romanonan ku a konsentrá hopi riba doktrina i argumentonan (kapítulonon 1-11), e buki aki ta trata ku doktrina den praktika, especialmente aplikashon pa ku iglesia lokal. Maske e karta di 1 Korintionan ta hopi praktiko, tin kapítulo ku ta konsentrá riba doktrina. E karta aki, en kontraste di Romanonan ta hopi dirèkt, franko, simpel, no kompliká.

Pusíbelmente e buki aki ta kontené mas instrukshon pa iglesia lokal ku kualke otro karta den Beibel. Un motibu prinsipal pa esaki ta pasobra e iglesia di Korintio tabatin hopi problema ku Pablo, guiá pa Spiritu Santu, mester a korigí. Sin duda, e no tabata un karta fásil pa Pablo skirbi, pasobra e buki aki ta trata ku e problemanan.

Di nos perspectiva—2000 aña despues—nos por ta hopi agridisidu pa nan problemanan. Si nan no tabatin tantu problema, nos lo a pèrdè hopi instrukshon balioso ku 1 Korintionan ta kompartí.

E nòmber mas antiguo pa e buki aki ta *Pros Korinthous A*, ku ta nifiká e promé di e korintionan. Sin duda *A* tabata inkluí despues pa distinguí e karta aki for di 2 Korintionan.

## I. TRASFONDO DI E BUKI

Pablo a skirbi su karta pa kreyentenan na e stat di Korintio. Pa komprende e hendenan di iglesia di Korintio, ta un yudansa pa sa algu tokante e siudat di Korintio.

### A. HISTORIA DI KORINTIO

Korintio a eksistí pa hopi aña. E area unda e stat di Korintio ta lokalísá tabata habitá desde 3000 pa 2500 B.C. Pa aña 800 B.C., e stat di Korintio mes a wòrdu fundá. Pronto e tabata un siudat-estado riku.

Na aña 196 B.C., e romanonan a deklará Korintio un stat liber. Ma ora tabatin guera entre e romanonan i Gresia, Korintio tabata un lider den oposishon kontra Roma. Komo resultado, e komandante romano, Lucius Mummius a konkistá Korintio i a destruí na aña 146 B.C. Pa shen aña, e sitio a keda desolá. Ma pasobra e lokalidat tabata asina stratégiko, Julio Cesar a rekonstruí e stat na 46 B.C. na e mésun sitio, restorando su prominensia i splendor. El a

yama e stat “Laus Iulia Corinthus.” Corintio a bira un kolonia di Roma i kapital di Akaya. Latin tabata e idioma ofisial di Korintio.

## **B. GRANDESA DI KORINTIO**

Awendia e stat di Korintio ta di poko importansia. Ma den tempu di Tèstament Nobo, e tabata un stat masha importante, riku ku tabata prosperá, un stat situá na un lugá sumamente stratégiko. E nòmber “Korintio” ta nifiká ornamentu òf dekorashon.

Su poblashon probabelmente asta a yega na 200.000 hòmbler liber i 500.000 katibu. (Katitunan tabata e empleadonan di e era ei.) Korintio a bira un di e siudatnan mas grandi, mas riku i mas importante di henter Impero Romano. Solamente Roma, Alexandria i Antiokia tabatin poblashon mas grandi e tempu ei.

Korintio tabatin un poblashon miksto unda maldat a reina. E poblashon a konsistí di ofisialnan i komersiantenan romano, desendientenan griegu di komersiantenan ku a regresá na Korintio despues di destrukshon di e stat, hudiunan ku a bin biba na Korintio pa motibu di Negoshi, hende di oriente. Ma tambe tabatin hopi otro rasa i kultura tur mesklá den e siudat: algun hende for di Fenisia i Frigia, filósophon, katibunan i hende liber, marineronan, hende ku tur sorto di bisio, èts.

Gresia ta konsistí di dos parti. E parti nort tabata konosí den tempu di Tèstament Nobo komo Masedonia. I e parti sùit tabata yamá Akaya. Meimei di e dos partinan ei tin un pida tereno small—kasi manera un brùg. Korintio tabata situá riba e península 6,4 kilometer hanchu ku laman na tur dos banda—ku Laman Aegeo (pariba) i Laman Adriatico (pabao).

1. Komo resultado, Korintio tabata importante pa transporte nort-sùit. Biahando na pia, ku kabai òf garoshi e biahero a hañ’é obligá pa pasa dor di e stat di Korintio. Atenas tabata 65 kilometer pariba di Korintio na otro banda di e península. Esei riba su mes a sorú pa bastante entrada pa negoshinan di Korintio.

Ma Korintio tambe tabata situá riba e ruta prinsipal di komersio den Impero Romano pariba-pabou. Pues, mayoria di e komersio di Roma a pasa dor di e stat pa henter medio oriente i vise versa. E transporte komersial tabata mas parti ku barku. Korintio tabata yamá “e brùg di laman”.

Ademas, pa nabegá rònt di e parti sùit di Gresia (Akaya), barkunan mester a hasi un viahe largu di 400 kilometer. Nan mester a pasa Kabo di Maleas—un parti di laman hopi peligroso pa nabegá. E griegunan tabatin dos dicho: “Laga esun ku ta nabegá rònt di Maleas lubidá su kas” i “Laga esun ku ta nabegá rònt di Maleas prepará su testament promé.”

Pa motibu di e peliger i distansia, hopi kapitan a trese nan botonan na Korintio. Si tabata un boto chikitu, nan a saka e boto for di awa, pon’é riba wil, i hal’é e 6,4 kilometer pa otro banda di e península. Mas òf ménos na aña 580 B.C., Periander a konstruí un kaminda di piedra pa e proposito aki. Si e boto tabata grandí, nan a deskargá e barku, transport e karga na otro banda di e península, i pon’é den un otro barku. Esaki a skapa a nabegantenan 400 kilometer di laman peligroso i tabata un ruta mas ekonómiko. E parti aki di e península asta tabata konosí komo “Dialkos”—un palabra griegu ku ta nifiká “halá di un banda pa otro.”

Pa fasilitá esaki, Korintio tabatin haf na kada banda di e península. E haf pabao tabata yamá Lechaem i esun pariba tabata e pueblo di Senkrea. (Romanonan 16:1 ta menshoná iglesia na e pueblo-haf aki.) Komo resultado, hopi marineru a bishitá Korintio i e stat a prosperá mas dor di e negoshi aki.

Emperadónan romano a gusta bishitá Korintio. Usando 6.000 prisonero hudiu, emperadó Nero, na aña 66 A.D., a kuminsá traha un kanal for di un banda pa otro di e península. Nan a logra koba 700 meter. Ma Nero a fayesé poko despues i e proyekto a para. No tabata te 25 yüli, 1893 ku fransesnan (prinsipalmente) a koba koba e kanal.

2. Otro opservashon di Korintio:

- **Industria.** Fuera di e entrada prinsipal ku Korintio a kosechá for di biaheronan i transportashon di botonan for di ùn banda di e península pa otro, e siudat tabatin un industria di alfareria (klei) i bròns.

- Edukashon. Tabatin skolnan di arte, siensia, idioma i filosofia. Atenas tabata un sentro di filosofia. Korintio a wordu influensí pa e filosofia di Atenas ma nunca a bira un sentro intelektual manera Atenas komo ku e habitantenan i turistanan tabata muchu okupá ku farandula i gastamentu di plaka.
- Deporte. Korintio tabata konosí komo un sentro deportivo. Kada dos aña, e stadion di Korintio tabata anfitrión di e weganan di Istmo. Solamente e weganan Olímpiko tabata mas popular na Gresia. (Seru Olympus ta situá mas nort.)
- Entretenamento i arte. E stat tabatin un teatro grandi ku 20.000 asiento pa hende bringa kontra bestia brabu òf kotra otro—bringa te na morto. Tabatin un otro teatro ku dak ku 3000 asiento pa komedianan i músika.
- Polítika. Korintio a bira kapital di e mitar suit di Gresia, konosí komo Akaya.
- Religion. Idolatria tabata eksesivo na e stat. Tabatin hopi tèmpe, lugá santu, altar, i diosnan. Ma e religion ku a destaká tabata e tèmpe di Afrodite.

Pablo su strategia mishonero tabata pa funda iglesianan den statnan importante ku por impaktá e mundu tònt di dje. Ta fásil pa komprende pakiko Pablo a selektá Korintio. Turistanan i biaheronan ku a bishitá Korintio lo por tende e evangelio i hiba e bon nobo na hopi otro provinsia i pais.

### C. MALDAT DI KORINTIO

Korintio tabata bon konosí pa su piká. Un persona a bisa ku Korintio tabata, “Un stat renombrá i sensual, unda e bisionan di oriente i oksidente a topa.” Asta e palabra griego “*korinthiazomai*” a nifiká pa komportá manera un habitante di Korintio, referiendo na un bida baho di inmoralidat—den otro palabra, pa djòdjò den piká. Si un hende a yamábo un hende di Korintio, esei tabata un insulto. Prostitushon tabata normal. Den komedianan, habitantenan di Korintio semper tabata pintá komo hende immoral i buráchi. Parti sùit di e marshe di Korintio tabatin bar pegá ku otro ku baki bou di tera pa mantené e bebida friu. No tin nodi di bisa ku divorsio tabata komún. Korintio tabatin un reputashon pa inmoralidat. Por a haña tur klase di bisio i polushon moral na Korintio.

Den henter Beibel, no tin deskripshon mas teríbel di djòdjòmentu den piká ku Romanonan 1:18-32. Algun aña despues, Pablo a skirbi e deskripshon ei for di Korintio. E por a mira tur e pikánan ei for di bentana di su kas na Korintio.

Manera mayoria stat griegu, Korintio tabatin loka nan a yama un “akropolis”. “Akropolis” literalmente ta nifiká “stat haltu”. Esaki tabata un seru den bisendario ku tabata usá komo un lugá pa defensa si e stat ta ataká. E “akropolis” di Korintio tabata yamá “Akrokorintio” i tabata 600 meter haltu. Nunca un ehersito enemigu a logra konkistá Akrokorintio te era di armanan moderno i mas sofistika.

Ma e Akrokorintio tabata un di e fuentenan prinsipal di su maldat, pasobra e tèmpe renombrá di Afrodite, e diosa di amor, tabata situá riba e seru. (Nòmber romano pa e diosa aki tabata Venus.) E tèmpe tabatin mil saserdote femenino ku tabata katibunan sagrado. Un parti di e adorashon di Afrodite tabata relashon íntimo entre e adoradó i un saserdote sagrado (prostituta di tèmpe). Anochi e prostitutan a baha e seru, bin hasi nan fecheria den e kayanan di Korintio.

E griegunan tabatin un dichu, “No tur hòmer ta sufisiente riku pa bishitá Korintio!” Un eskritor a deskribí Korintio komo “paraíso pa e marinero, shelu pa e buraché i fièrnu pa e muhé birtuoso.”

Esaki tabata e stat ku Pablo a enkontrá ora el a bishitá (den Echunan 18). Pablo asta a lista algun di e pikánan di Korintio ora el a deskribí bida di kristianan di Korintio promé ku nan a kombertí na Kristu. Den 1 Korintionan 6:9-11, el a lista “*fornikadó...adoradó di dios falsu...adúltero...esnan afeminá...homoseksual...ladron...esnan golos pa plaka...buraché...blasfemadó...estafadó...*” Pues, iglesia di Korintio a konsistí di hende ku a hiba tur sorto di bida parotin. I ta obvio ku algun no a bandoná nan bidanan bieu...

Merrill Unger a bisa ku 1 Korintionan a wòrdu skirbí “pa instruí hende ku a kaba di kombertí for di e paganism mas baho i grosero ku nan bisio i piká, praktiká notabelmente na Korintio... No tabata fásil pa e kreyentenan aki kibra ku nan pasado degenerá. Nan karnalidad i inmatures spiritual a nesestá instrukshon ku pasenshi di parti di e apòstel.”

## II. OUTOR DI E BUKI

Nos a mira ku tin poko duda ku Pablo a skirbi e buki di Romanonan. E kaso ta similar ku 1 Korintionan. Studiantenan di Beibel ta aseptá kasi universalmente ku Pablo a skirbi e buki di 1 Korintionan.

### A. EVIDENSIA EKSTERNO

E evidensia ku Pablo a skirbi 1 Korintionan ta hopi fuerte. Fuera di Beibel tin hopi evidensia. Clemente di Roma (A.D. 97) a skirbi un karta na iglesia di Korintio i a yama 1 Korintionan “e karta di Pablo, e apòstel bendishoná”. (Ta interesante ku e karta ta duna di konosé ku e mésun problemanan ku Pablo a menshoná den 1 Korintionan tabata eksistí ainda den iglesia di Korintio.). E *Karta di Barnabas* (entre A.D. 70 i 131), e dokumento *Didache* (fechá entre A.D. 40-60), Polikarpo, Hermas, Justin Martir, Athanagoras, Irenaeus, Clemente di Alexandria, Ignactius, Tertullian, e Kanon di Muratorio, Marcion, e teksto antiguo di Siria i e teksto antiguo Latin—tur ta afirmá ku Pablo tabata outor humano di 1 Korintionan.

### B. EVIDENSIA INTERNO

E evidensia ku nos ta haña den e buki di 1 Korintionan mes ta indiká kla ku Pablo tabata eskritor di e karta:

1. E outor ta identifiká su mes komo Pablo na kuminsamentu di e karta: “*Pablo, yamá pa ta un apòstel di Jesu-Cristo, pa e boluntat di Dios...*” (1:1). E outor a bisa un sekretario kiko pa skirbi. Na final di e karta e eskritor a skirbi, “*E saludo aki ta skirbí ku mi propio man—Pablo.*” (16:21).

Nota tambe ku e outor a bisa den 3:4, “*...esun ta bisa: ‘Ami ta di Pablo,’ i un otro: ‘Ami ta di Apolos,’...*”, 3:5 ta sigui menshoná e mésun dos persona: “*Kiko Apolos ta anto? I kiko Pablo ta?*”, i despues 3:6 simpelmente ta skirbi, “*Ami a planta, Apolos a muha...*” Atrobe 3:22 ta menta e mésun dos nòmber. E indikashon ta ku “*ami*” ta Pablo. E implikashon di 1:13-17 ta ku e outor ta Pablo.

Tur esaki ta harmonisá ku e otro kartanan ku Pablo a skirbi i tambe ku Echunan.

2. E outor a laga sa ku e ta un apòstel na diferente okashon. “*Pablo, yamá pa ta un apòstel di Jesu-Cristo...*” (1:1). “*Dios a pone nos, apòstelnan, komo último...*” (4:9) “*Mi no ta un apòstel?*” (9:1) “*Pasobra ami ta esun di mas menos di e apòstelnan, kende no ta digno pa wòrdu yamá apòstel.*” (15:9).

3. E outor a laga sa ku el a mira Hesus resusitá—loke tabata e kaso na kaminda pa Damasko (Echunan 9:3-6). “*Mi no ta un apòstel? Mi no a mira Hesus nos Señor?*” (9:1). “*...por último El a parse na mi tambe, manera na un ku a nase for di tempu*” (15:8).

4. E outor tabatin un relashon spesial ku Timoteo, manera tata ku yu: “*...mi a manda Timoteo serka boso, kende ta mi yu stimá i fiel den Señor...*” (4:17).

5. E outor a laga sa ku el a prediká na Korintio, loke Pablo a hasi segun Echunan 18:1-18. E outor a skirbi di e manera ku e tabata disididu pa kompartí Palabra di Dios den 2:1-5.

6. E outor a laga sa ku el a funda iglesia di Korintio, loke ta kuadra ku e relato den Echunan 18:1-18. “*Ami a planta...mi a pone un fundeshi manera un arkitekto sabí, i un otro ta trahando riba djé.*” (3:6,10; mira tambe 4:15).

7. E outor a usa su mes i Apolos komo ilustrashonnan (1:12; 3:4-6,22; 4:6). Tantu Pablo komo Apolos tabata prominente den establesementu di iglesia di Korintio segun Echunan 18.

Tur e puntonan aki huntu ta duna indikashon fuerte ku Pablo a skirbi e buki.

### III. LEKTORNAN DI E BUKI

E relato di Pablo su di dos biahe mishonero, ta haña den Echunan 15:50-18:22). Pablo a biaha huntu ku Silas (15:40). Nan a bishitá Siria i Silisia (15:410, Derbe i Listra (16:1)—unda Timoteo a djòin nan (16:3). Despues nan a sigui pa Frigia i Galasia (16:6) anto Misia i Troas (16:8).

Dor di un vishon, Dios a guié na Oropa. Filipos tabata su promé sitio di ministerio na Oropa (16:9-40). El a logra establese un iglesia, ma a hané oblige pa bandoná Filipos. Maske el a funda iglesianan na Tesalonika i Berea, e hudiunan a kore kuné for di tur dos stat (17:1-14). El a laga Silas i Timoteo na Berea. Mientras e tabata warda pa nan djòin e, el a prediká na Atenas (17:15-34). Ma e no a kosechá hopi eksito ei. Djei, el a biaha pa Korintio su so, yegando mas óf ménos na aña A.D. 50-52. Ta parse ku el tabata desanimá. El a skirbi e korintionan, “...*mi tabata serka boso den debilidat i den miedu i ku hopi temblamentu*” (1 Korintionan 2:3).

Echunan 18:1-17 ta konta e storia kon el a funda e iglesia na Korintio. Pa mantené su mes, Pablo a traha tent na Korintio. E lo a siña e fishi aki for di su hubentut. Probabelmente dor di su ofishi, el a sera konosí ku Akila i Prisila (18:2-3), hudiunan ku tabatin e mésun ofishi. Akila i Prisila tabata entre e hudiunan ku emperadó Claudio a saka di Roma na 49 A.D. (Echunan 18:2). Ta pusibel ku dor di e kontakto aki ku Pablo, nan a kombertí na Kristu. Pablo a aseptá pa keda biba serka nan.

Limitá dor di su trabou trahando tènntnan, Pablo a prediká den snoa riba sabat so. Ma ora Silas i Timoteo a yega Korintio, nan a trese un regalo huntu ku nan ku iglesia na Filipos a manda (2 Korintionan 11:8-9; Filipensenan 4:15). Esaki a duna Pablo libertat pa kontinuá su ministerio tempu kompleto.

Komo resultado di su ministerio, hopi hende di Korintio a kere den Hesus, inkluiendo hudiunan. Asta Crispo, líder di snoa (18:8), huntu ku hendenan di su kas, a kombertí. Ma mayoria hudiunan a oponé kontra Pablo su mensahe ku Hesus ta e Mesias, i a oblig’ é pa bandoná e snoa. Pablo a kuminsá prediká pa paganonan (18:6). Ma e no a rechasá e hudiunan por kompleto. Ta interesante ku maske Pablo a bisa “*for di awor padilanti lo mi bai serka e paganonan*”, el a sigui proklamá Kristu na kas di Justu, *pegá ku snoa*. Tambe ta parse ku hopi hende ku no tabata hudiunan a kombertí na Kristu.

Maske Pablo tabata na Korintio, e no a lubidá e iglesianan ku el a funda na otro statnan. Durante tempu ku Pablo tabata na Korintio ku el a skirbi dos karta pa e Tesalonisensenan.

Un insidente importante a tuma lugá ora Pablo tabata na Korintio, menshoná den 18:12-17. E hudiunan a akusá Pablo dilanti tribunal di Galion, gobernadó romano di Akaya. (Nos sa di historia ku Galion [Echunan 18:12] a bira prokonsul di Akaya na yüli, 51 A.D.) Probabelmente e akusashon tabata ku kristianismo ta un religion ilegal den impero romano. Ma Galion rápidamente a konkluí ku kristianismo tabata un sekta hudiunan i pues tabata un asunto religioso, no politiko. El a kore ku e hudiunan. Komo resultado, algun mirones a lamta kontra e hudiunan. Sabiendo ku e outoridatnan polítiko lo no intermeté i ku e hudiunan no por surpasá lei, esaki a proveé libertat pa e korintionan praktiká nan fe, sin temor di persekushon.

Den un vishon, Dios a enkurashá Pablo pa ku su ministerio na Korintio bisando, “...*ningun hende lo no pone man riba bo pa hasibo daño, pasobra Mi tin hopi hende den e stat aki*” (18:10). Pablo a kontinuá ku su ministerio na Korintio pa 18 luna luna (18:9-11,18). Anto el a bai. Apolos, un hòmber elokuyente di Alehandria, a wòrdu instruí dor di Prisila i Akila i a bai Korintio i a kontinuá ku e ministerio (18:24-28; 1 Korintionan 3:6) komo e di dos lider spiritual di iglesia di Korintio.

Fuera di Crispo, Akila i Prisila e nòmbernan ligá ku iglesia di Korintio no tabata nòmbernan hudiunan. Pues, ta visto ku iglesia di Korintio a konsistí di algun hudiunan, ma mayoria tabata hende ku a kombertí for di paganimso. Tabatin hende riku den iglesia. Romanonan 16, skirbí for di Korintio, ta menta nòmber di diferente persona ku nòmbernan pagano (no-hudiunan). Gayo (16:23) tabata Pablo su anfitrión na Korintio. Ta parse ku “*Erasto, e tesorero di stat*” (16:23) tambe tabata un kreyente riku. (Notabel ta ku arkeólogonan a deskubrí un piedra ku un inskripshon ku a bisa, “Erasto, komo rekompensa pa e piedranan poní ku su mes gastu”. Ta

probable pusíbel ku e inskirpshon aki a referí na e Erasto den 16:23.) Cloé, menshoná den 1 Korintionan 1:11, tabata un dama riku ku tabata doño di algun esklabu. Ma, segun nos sa, mayoria kreyente den iglesia tabata pover (1 Korintionan 1:26-29; 11:21).

Klaramente Pablo a skirbi su karta pa e miembronan di “*iglesia di Dios ku ta na Korintio*” (1 Korintionan 1:2). Ma ta parse ku Pablo tabata pensa ku otro hende lo lesa e karta tambe, pasobra den e mésun teksto Pablo a sigui skirbi “...*huntu ku tur esnan ku tur kaminda ta invoká e nòmber di nos Señor Jesu-Cristo, nan Señor i di nos.*”

Tambe ta bon pa menshoná ku talbes durante e tempu aki, Pablo a funda un otro iglesia na e stat ku tabata haf pa Korintio, na Senkrea. Den Romanonan 16:1 Pablo a skirbi, “*Mi ta rekomendá na boso nos ruman muhé Febe, kende ta un sirbiente di e iglesia na Senkrea.*”

#### **IV. SKIRBIMENTSU DI E BUKI**

Ora Pablo a bandoná Korintio, ta parse ku e iglesia tabata basta grandi (18:8,10). For di Korintio, Pablo a biaha pa Efeso (18:19-21) i a regresá na Antiokia (18:22), e iglesia ku a mand’é komo mishonero.

Durante Pablo su ousensia, Prisila i Akila (ku talbes a biaha pa Efeso huntu ku Pablo) a topa ku Apolos, i a splik’é Palabra di Dios mas mihó (18:24-28). Apolos a bai Korintio i a prediká aya (19:1; 1 Korintionan 1:12; 3:5-6). E iglesia di Korintio a forma partidonan: algun pro Pablo, otronan a favoresé Apolos. E echu ku tabatin un partido pro Pedro ta duna indikashon ku podisé Pedro tambe a bishitá Korintio durante e tempu aki (1 Korintionan 1:12). Ma no tin ningun evidencia pa su bishita.

Durante Pablo su di tres biahe mishonero, el a regresá na Efeso (19:1) i a keda ei pa por lo ménos tres aña (19:10; 20:31). Durante su estadia na Efeso, hendenan di kas di señora Cloé (1 Korintionan 1:11) a bishitá Pablo i a lag’é sa tokante problemanan na iglesia di Korintio. (Nos no sa si e hendenan di kas di Cloé a bin di Korintio pa bishitá Pablo na Efeso òf si nan tabata kreyentenan di Efeso ku a bishitá Korintio i despues di regresá na Efeso i a duna Pablo un relato despues di nan bishita.) Anto Stéfanas, Fortunato i Akaiko (1 Korintionan 16:17)—un delegashon ofisial di iglesia di Korintio—a trese un kontribushon pa Pablo huntu ku un karta. Ta parse ku nan a konta Pablo ku tabatin problema ku immoralidat den iglesia (5:1-13), ku kreyentenan tabata hiba otro dilanti hues (6:1-11) i ku tabatin malkomprendementu tokante moralidat i libertat (6:12-20). E karta ku e Korintionan a manda pa Pablo a hasi diferente pregunta. Pues, e relato ku Pablo a tende di hendenan di kas di Cloé i e bishita di e trio i e karta di Korintio a okashoná Pablo su skirbimentsu di 1 Korintionan.

Ta pusíbel ku Pablo a skirbi e karta den dos etapa. E por a skirbi e promé kuater kapítulo despues di tende e relato di hendenan di kas di Cloé. Anto ora Stéfanas, Fortunato i Akaiko a konta Pablo kiko tabata sosodé den iglesia i a trese e karta for di iglesia di Korintio hasiendo diferente pregunta, Pablo por a skirbi kapítulon 5-16.

E karta di 1 Korintionan ta indiká ku Pablo tabata na Efeso. “*Ma lo mi keda na Efeso te Pentekostes...*” (1 Korintionan 16:8). Tambe 1 Korintionan 16:19 ta indiká ku Pablo tabata na Asia huntu ku Akila i Prisila. Efeso tabata parti di loke e tempu ei tabata konosí komo Asia Menor. Akila i Prisila tabata biba na Efeso e tempu ei.

Probabelmente el a skirbi su karta na aña A.D. 55. Talbes Pablo a manda su karta bèk na Korintio na man di e trio ku a bishit’é (Stéfanas, Fortunato i Akaiko).

Tèstament Nobo ta kontené dos karta ku Pablo a skirbi na e korintionan. Ma ta parse ku el a skirbi por lo ménos dos otro karta pa nan. Den 1 Korintionan 5:9, Pablo a bisa “*Den mi karta mi a skirbi boso...*” Esaki ta referí na un karta ku Pablo a skirbi promé ku 1 Korintionan. Awendia, ningun hende no tin kopia di e karta ei i ningun hende sa contenido di e karta fuera di loke 5:9 ta duna di konosé.

Tambe ta parse ku e karta ku Pablo ta menshoná den 2 Korintionan 2:4 i 7:8 no ta deskribí 1 Korintionan. Pesei hopi studiante di Beibel ta di opinion ku el a skirbi un otro karta ku no ta den Beibel.

Pues, e siguiente skema talbes ta indiká e kronologia di Pablo su bishitanan i kartanan:

- Bishita #1 – Echunan 18:1-18
  - Karta #1 – 1 Korintionan 5:9 (11)
  - Karta #2 – 1 Korintionan
- Bishita #2 – 2 Korintionan 13:2
  - Karta #3 – 2 Korintionan 2:4; 7:8
  - Karta #4 – 2 Korintionan
- Bishita #3 – 2 Korintionan 13:1; 12:14

Iglesia a aseptá 1 Korintionan komo inspirá poko despues ku el a wòrdu skirbí. Pablo mes a deklará ku esei tabata e kaso ora el a skirbi, “*Si tin un hende ta kere ku e ta un profeta òf ku e ta spiritual, lagu’é rekonosé ku e kosnan ku mi ta skirbi boso ta e mandamentu di Señor*” (14:37). Shen aña despues ku Pablo a skirbi 1 Korintionan, e Kanon di Muratorio a inkluí e karta aki komo un di e 13 Kartanan di Pablo. E impliklashon tabata ku 1 Korintionan tin méson outoridat ku e otro kartanan di Pablo.

## V. PROPOSITO DI E BUKI

Diferente motibu pa skirbi e karta di 1 Korintionan ta visto den e teskto:

1. Pa korigí práktikanan fo’i sla den e iglesia di Korintio—práktikanan ku nan no a konsiderá serio òf piká.
2. Pa kontestá preguntanan ku e korintionan a hasi Pablo den un karta ku Stéfanos, Fortunato i Akaiko a trese.
3. Pa proveé instruksjon doktrinal nesenario. E ehèmpel prinsipal di esaki ta 1 Korintionan 15—e kapítulo tokante e doktrina di e resurekshon.
4. Pa anunsiá su plan pa bishitá e korintionan atrobe (1 Korintionan 4:18-21; 11:34; 16:2-5).

Un pusibel tema di e buki ta: Kon Kristu i Su krus ta apliká na problemanan kompliká di un iglesia ku a sali for di un komunidad pagano. Un outor ta yama 1 Korintionan “E Karta di Santifikashon”

## VI. STRUKTURA DI E BUKI

Pablo a risibí informashon for di e hendenan di kas di Cloé (1:11), probabelmente for di Stéfanos, Fortunao i Akaiko (16:17) i sigur for di un karta ku nan a trese for di iglesia di Korintio hasiendo pregunta di Pablo.

Den e promé seis kapítulo di su karta, Pablo ta trata ku e informashon verbal ku el a haña, e pikánan i problemanan di e korintionan. Den e di dos parti, Pablo a kontestá nan preguntanan.

- I. KUMINDAMENTU - 1:1-9
- II. KORIGIENDO PIKÁ DEN IGLESIA - 1:10-6:20  
(Reakshonando riba un relato ku Pablo a risibí)
  - A. Korigiendo Desunion den Iglesia - 1:10-3:23
  - B. Defendiendo Su Propio Ministerio - 4:1-21
  - C. Disiplinando Inmoralidat - 5:1-13
  - D. Rechasando Kasonan Legal - 6:1-11
  - E. Reprendiendo Abusonan Seksual - 6:12-20
- III. KONTESTANDO PREGUNTANAN DI IGLESIA - 7:1-16:9  
(Kontestando preguntanan den nan karta)
  - A. Preguntanan Tokante Matrimonio - 7:1-24

- B. Preguntanan Tokante Birgennan - 7:25-40
- C. Preguntanan Tokante Kosnan Sakrifika na Idolonan - 8:1-11:1
- D. Preguntanan Tokante Problemanan den Sirbishinan - 11:2-34
- E. Preguntanan Tokante Donnan Spiritual - 12:1-14:40
- F. Preguntanan Tokante Resurekshon - 15:1-58
- G. Preguntanan Tokante Ofrenda - 16:1-4

#### IV. KONKLUSHON - 16:5-24

Un otro pusíbel skema pa ku e buki ta basá riba e prosedura ku Pablo a usa pa skirbi su karta. E pensamentu ta ku el a reakshoná promé pa ku e informashon ku el a risibí di hendenan di Cloé, despues el a trata ku informashon ku el a risibí verbal for di e trio ku a trese e karta, i por último, el a respondé preguntanan ku e karta a hasi. Lo siguiente ta un skema general basá riba e pensamentu aki:

- I. INTRODUKSHON - 1:1-9
- II. REAKSHONANDO PA KU E RAPÒRT RISIBÍ DI CLOÉ - 1:10-4:21
- III. REAKSHONANDO PA KU E RAPÒRT VERBAL RISIBÍ DI STÉFNAS, FORTUNATO I AKAIKO - 5:1-6:20
- IV. RESPONDIENDO E KARTA DI KORINTIO - 7:1-16:4
- V. KONKLUSHON - 16:5-24

## VII. OPSERVASHONAN DI E BUKI

Nota diferente punto relashoná ku e buki.

### A. KONTENIDO I STAIL DI E BUKI

Den su karta, Pablo a duna instrukshon tokante preguntanan ku e korintionan a hasi: matrimonio (7:1-24), birgennan (7:25-40), kosnan sakrifiká na ídolonan (8:1-11:1), problemanan den sirbishinan (11:2-34), donnan spiritual (12:1-14:40), ofrenda (16:1-4). Ripará ku kada un di e sekshonnan aki ta introdusí ku e palabranan “*awor (tokante)*” (7:1,25; 8:1; 11:2; 12:1; 16:1).

Ma Pablo tambe a duna instrukshon ku e korintionan no a pidi. Preokupá pa loke el a tende tokante susesonan den e iglesia, Pablo a skirbi pa korigí divishon den iglesia, immoralidat den iglesia, kreyentenan ta hiba otro dilanti hues, abuso di libertat kristian, chaos ku a reina den sirbishinan, inkluiendo Sena di Señor.

1 Korintionan ta un di e bukinan mas variá di Pablo pa loke ta trata contenido i stail. Den e karta Pablo ta reakshoná pa ku e situashon di iglesia di Korintio. Pesei e karta ta korektivo, praktiko i dirèks. Su stail di skirbi tabata hopi informal—komo sifuera e tabata kombersá ku e lídernan di iglesia di Korintio. El a hasi uso di un variendat di stail di skirbi: lógika, elogio, sarkasmo, rogamentu, reprimendementu, poesia, narashon, siñamentu.

### B. TEKSTONAN DIFÍSIL PA KOMPREDÉ

Den nos era moderno, no ta fásil pa nos kompredé algun konsepto den e karta. Ma loke nos no ta kompredé, tabata kompredíbel pa e korintionan den nan era i kultura. Por ehèmpel:

- Kiko ta nifiká “*entregá un hende asina na Satanas*” (5:5)
- Kiko tabata e “*e kalamidat aktual*” di kua Pablo a skirbi (7:26)?
- Nos ta lucha pa kompredé 7:36-38—si e teksto ta papia di birgennan òf yunan muhé.
- I kiko “*batisá pa e mortonan*” (15:29) ta nifiká?
- Tampoko nos no ta kompredé ora Pablo a skirbi ku el a “*bringa ku bestianan*” (15:32).



No ta meta di un introdukshon pa kontestá preguntanan asina—algu ku komentaristanan ta argumenta ku hopi palabra.

### C. TEKSTONAN KLAVE

E buki di 1 Korintionan ta kontené diferente teksto klásiko tokante vários tema. Ningun teksto den Beibel por kompará ku kapítulo 15, tratando ku e doktrina di resurekshon. No tin duda ku un di e kapítulonon mihó konosí di Tèstamènt Nobo, Korintionan 13, ta surpasá tur otro literature bíbliko òf sekular tokante stimashon. Ken no ta apresí e kapítulo aki pa su bunitesa!

Ma e karta tambe proveé siñansa di igual importansia huntu ku otro tekstonan. Maske e relato histótiko di e Sena di Señor ta hañá den e Evangelionan, siñansa tokante Sena di Señor ta hopi kla den 1 Korintionan 11:17-34. Ora ta trata ku e tópiko di matrimonio, ningun estudiante serio di Beibel por ignorá 1 Korintionan 7. Kapítulonon 8-10 huntu ku Romanonan 14-15 ta proveé splikashon úniko tokante libertat Kristian. No ta pusíbel pa ignorá kapítulonon 12-14 den un estudio tokante donnan spiritual. I ningun teksto ta mas kla tokante e don di lenganan ku 1 Korintionan 14. Otro kapítulo ta trata ku tópikonon na un forma ku ta destacá: union den iglesia (kapítulonon 1-3), disiplina den iglesia (kapítulo 5), hiba otro kreyente dilanti hues (6:1-11), immoralidat (6:12-20), èts.

Un otro teksto klave—sinembargu mas kòrtiku—ta tokante e evangelio. 1 Korintionan 15:1-8 ta presentá e puntonan básiko di e evangelio. *“Pasobra na promé lugá mi a duna boso loke mi tambe a risibí, ku Cristo a muri pa nos pikánan segun e Skrkituranan i ku El a wòrdu derá, i ku El a wòrdu lantá riba di tres dia segun e Skrituranan...”* E echu ku e teksto aki a skirbí mas òf ménos 25 aña despues di morto i resurkeshon di Hesus, tabata fásil pa komprobá si e faktonan ta korekto. *“...El a paresé ba Sefas, despues na e diesdosnan. Despues di esei El a paresé na mas ku sinku shen ruman na e mesun tempu, di kualnan mayoria ta na bida ainda, ma algun a muri; despues El a paresé na Santiago, despues na tur e apòstelnan; i por ultimo El a paresé na mi...”*

### D. STIMASHON PA MUNDU

Nos tin ku kòrda ku e kreyentenan na Korintio a nase den un stat sumamente immoral i pekaminoso. Pablo a funda e iglesia den e stat pekaminoso di Korintio. Esei tabata in viktoria. Ma tabata difísil pa prevení Korintio di infiltrá iglesia. Preokupá, Pablo a skirbi su karta pa e korintionan. Básikamente su karta a komuniká , *“No stima mundu, ni e kosnan ku tin den mundu”* (1 Juan 2:15).

Nos ta regosihá ora iglesia ta establese den mundu. Ma ta un doló ora mundu ta den iglesia. Di igual manera, nos ta kontentu ora un barku nobo ta “lansá” den awa di laman pa promé biaha. Ma ta trágiko ora awa di laman ta dreña den e barku.

Hopi kreyente awendia tin e mésun mentalidat ku e korintionan. Nan ta *den* mundu i ta lubidá ku nan no ta *di* mundu (Juan 17:11-17). Hopi biaha, na lugá di iglesianan infiltrá mundu pa Kristu, mundu ta infiltrá nos iglesiannan. Nos ke ta kristian i ke biba pa Dios. Ma na mésun tempu nos ke ta méskos ku mundu. Nos ta stima mundu. Hesus a bisa, *“Ningun hende no por sirbi dos shon”* (Mateo 6:24).

Ora nos ta bin na Kristu, Dios por a saka nos di mundu. Ma El a laga nos den mundu pa nos por alkansá otronan pa Kristu. Nos mester tin kontakto ku hende sin Kristu pa nos por yuda nan bin konosé Kristu! Ma nos mester tene kuidou pa nos no bira méskos ku mundu!

## Literatura Konsultá

- Alexander, David & Patricia, editors. *Eerdmans' Handbook to the Bible* (Grand Rapids, Michigan: William B. Eerdmans Publishing Company, 1980), p. 589-595.
- Barclay, William. *The Letter to the Corinthians Revised Edition The Daily Study Bible Series* (The Westminster Press: Philadelphia, 1975), p. 1-8.
- Baxter, J. Sidlow. *Explore the Book* (Grand Rapids: Zondervan Publishing House, 1960), vol. 6, p. 91-118.
- Blair, J. Allen. *Living Wisely* (Neptune, NJ: Loizeaux Brothers, 1969), p. 9-11.
- Boyd, Robert T. *Boyd's Bible Handbook* (Eugene, Oregon: Harvest House Publishers, 1983), p. 516-529.
- Bruce, F.F. "Corinthians, First Epistle to the", *The Zondervan Pictorial Encyclopedia of the Bible* (Grand Rapids, MI: Zondervan, 1976), vol. 1, p. 964-972.
- Demaray, Donald E. *Bible Study Sourcebook* (Los Angeles: Cowman Publishing Company, 1964), p. 160-162.
- Douglas, J.D. organizing editor, *The New Bible Dictionary* (Grand Rapids, Michigan: Wm. B. Eerdmans Publishing Co., 1962), p. 252-257.
- Gromacki, Robert G. *New Testament Survey* (Grand Rapids, Michigan: Backer Book House, 1981), p. 198-215.
- Gundry, Robert H. *A Survey of the New Testament* (Grand Rapids, Michigan: Zondervan Publishing House), p. 261-271.
- Guthrie, Donald. *New Testament Introduction* (Downers Grove, Illinois: InterVarsity Press, 1970), p. 421-446.
- Halley, Henry H. *Halley's Bible Handbook* (Grand Rapids: Zondervan Publishing House, 1964), p. 544-551.
- Hadjiantoniou, George A. *New Testament Introduction* (Chicago: Moody Press, 1957), p. 192-201.
- Hindson, Edward E. & Kroll, Woodrow Michael. gen. ed. *Liberty Bible Commentary* (Nashville, TN: Thomas Nelson Publishers, 1983), p. 2276-2279.
- Jensen, Irvin, L. *Jensen's Survey of the New Testament* (Chicago: Moody Press, 1981), p. 262-281.
- Lockyer, Herbert. gen. ed. *Illustrated Bible Dictionary* (Nashville, TN: Thomas Nelson Publishers, 1986), p. 253-257.
- MacArthur, John. *The MacArthur New Testament Commentary: 1 Corinthians* (Moody Press, Chicago, 1984), p. vii-x.
- MacArthur, John. *MacArthur's Quick Reference Guide to the Bible* (Nashville, TN: W Publishing Group, 2001), p. 218-224.
- Mare, W. Harold. *The Expositor's Bible Commentary* Frank E. Gaebelin, General Editor (Regency Reference Library; Zondervan Publishing House; Grand Rapids, Michigan, 1976), p. 175-183.
- McGee, J. Vernon. *Thru the Bible with J. Vernon McGee* (Nashville, TN: Thomas Nelson Publishers, 1981), vol. v, p. 1-3
- Mears, Henrietta C. *What the Bible is All About* (Minneapolis: World Wide Publications, 1966), p. 459-469.
- Miller, Adam W. *Brief Introduction to the Old Testament* (Anderson, Indiana: Warner Press, 1964).
- Morris, Leon. *The First Epistle of Paul to the Corinthians: Tyndale New Testament Commentaries* (Wm. B. Eerdmans Publishing Company: Grand Rapids, Michigan, 1980), p. 15-29.
- Pfeiffer, Charles F. ed. *The Wycliffe Bible Commentary* (Chicago: Moody Press, 1962), p. 1227-1230.

- Poehnell, Gray. Bib 102, New Testament Survey notes, Prairie Bible Institute, 1983.
- Richards, Lawrence O. gen. ed. *The Revell Concise Bible Dictionary* (Tarrytown, New York: Fleming H. Revell Company, 1991), p. 143-144.
- Robertson, A.T. *Word Pictures in the New Testament* (Nashville, TN: Broadman Press, 1931), p. 65-67.
- Rupprecht, A. "Corinth", *The Zondervan Pictorial Encyclopedia of the Bible* (Grand Rapids, MI: Zondervan, 1976), vol. 1, p. 960-964.
- Tenny, Merrill C. *New Testament Survey* (Grand Rapids, Michigan: Wm. B. Eerdmans Publishing Co., 1980), p. 294-300.
- Thiessen, H.C. *Introduction to the New Testament* (Grand Rapids, Michigan: Wm. B. Eerdmans Publishing Company, 1960), p. 200-206.
- Unger, Merrill F. *Unger's Bible Handbook* (Chicago: Moody Press, 1967), p. 626-645.
- Walls, A.F. Douglas, J.D. organizing ed. *The New Bible Dictionary* (Grand Rapids: Wm. B. Eerdmans Publishing Co. 1962), p. 252-257
- Wiersbe, Warren W. *The Bible Exposition Commentary*, vol. 1 (Wheaton, IL: Victor Books, 1989), p. 568.
- Wilkinson, Bruce and Boa, Kenneth. *Talk Thru the Bible* (Nashville, Tennessee: Thomas Nelson, 2002), p. 381-386.